

Doek Nae Lo

Gvaq daihhanz le, gouj ngoenz-ngoenz cungj muengh mbwn miz raq nae laux ndeu daeuj. Ngoenz neix banhaet, miz di rongh iq ndeu con gvaq geh baengzcueng daeuj, gou couh caj mbouj ndaej lo, fwt dwk yat roengz mbonq daeuj, daenj ndang-daenj couh buet haeuj lajroq bae. Hw, raq nae laux dangqmaz bae! Gwnz ranz, gwnz ngeiqfaex, gwnz loh cungj doek rim nae haungat nei! Caen lumj coen sei Cinz Sinh: “Lumj naeuz rumzcin haemh fwt daengz, cien fanh goleiz va hai faengh.”

Gou ngamq gwn liux gij cukbazbaujcouh ndatfoed seiz, daxbuz gaenq daj laj laeuz riuj doengj nae rimrej ndeu daeuj. Dou youq ndaw bwnz guh boux vunz nae iq gvaqyinx ndeu. Sou yawj, de aen gyaеuj hung hung, lwgda ndaem ndwenndiqndiq, aen ndaeng hoengz soemsijsij, gaiq bakhung gaeuzgengh, gwnz gyaеuj daenj aen mauh soem iq, hoz heux

gaenhoz hoengz, yawj le raen dwggyaez dangqmaz.

Banringz gvaq, gou caeуq daxmeh byaij roen bae hagdangz. Byaij youq gwnz roen, naevaiq mbin fwngfwngh nei, caen lumj doenghgij seifwn baenzdiuz iqi haenx daenj haeuj vaiqhau liux, fwngz doxbeng youq gyang mbwn guhcaemz guh-angq. Gou youq gwnz giceh vax gaem nae hung ndeu baeuh coq daxmeh. “Bah!” Ndaek nae youq gwnz buhbwnyungz daxmeh sanqhai bae. Daengz hagdangz lo, nae yied doek yied haenq, dou youq ndaw nae menh byaij menh bae. Yw? Giz ndaem va doenghbaez heuswd haenx mbouj raen gvaq, bienqbaenz “ranghdieg nae” haungat lo! Aen cauhcangz bingzbwd gvangqlangh haenx hix mbouj raen lo, bienqbaenz “fan moeg hung” unqnemq soengsup ndeu. Gou guhmuengz lejlej dwk byaij coh cauhcangz, caij haeuj ndaw nae nanoek bae, laj din seiz




mbouj seiz yiengj sing “gahcih gahcih”, ce miz baenz coij baenz coij rizdin. Gou youq gwnz cauhcangz haenqrengz buet bae buet dauq, guhcaemz guh’ angq, simmaez

raixcaix.

W, neix caen dwg ciengz nae hung hawj gou youh angq youh vuenyungz!

(Gwz Anhsai raiz Daeglungz hoiz)



Duzgyau Iq, Mwngz Gaej Caegyawj

Cuengqhag le, gou youq ndaw fuengz raiz saw.

Ndaw fuengz caemrwrwk. Gou naengh youq naj daizsaw, heijdaеuz lienh raiz saw.

Daxmeh cungj naеuz gij saw gou sij haenx yakyawj lai, neix gou couh ndeindei lienhlien. Ngeix daengz lauxsae naeuz gvaq, sawcih aеu sij ndaej cingq, bit doxvang aеu bingz, bit daengj aеu soh, bit biet na ok aеu soem, gou ciuq saw baez bit baez veh dwk raiz, nyinhcaen sij sawcih aeundaej cingq ndei. Sij le sij le, gou roxnyinh baihnaj lumjnaeuz miz gijmaz, ngiengx gyaеuj hwnjdaеuj, cingq raen duzgyau iq ndeu duengh roengz baihnaj gou daеuj. Gou da cimyawj duzgyau iq, doiq de gangj: “Duzgyau iq ha, mwngz gaej caegyawj gou raiz saw!” Gou gaemh dawz de, coq de roengz gwnz namh bae, laebdaeb sij saw.

Gou sij saw sij lai le couh mbwq lai, okbae aеu cijvaiz gwn, youh guhcaemz yaep ndeu, caiq dauq daengz daizsaw laebdaeb raiz saw, youh raen laj daengdaiz miz duzgyau iq ndeu. Neix caen geizheih dahraix, baenzlawz youh dwg duzgyau iq? Duzgyau iq, dwg mwngz lwi? Mwngz youh daеuj caegyawj gou raiz saw? Lwnh mwngz dingq, caegyawj hix mbouj miz yungh, baedauq mwngz cungj mbouj bae lwnh daxmeh gou!

Duzgyau iq, mwngz gaej caegyawj lai, vaiq di baema! Mwngz hix wnggai guh hongsaeh bonjfaenh lo!

(Yauz Yijli raiz Daengningh hoiz)

Ga Haiz Dumz Ndeu

Ngoenzhaenx, gou bae diengzhaex liux le, mbouj rox vihmaz ga caij roengz mieng raemx bae. Ga haizbaengz gou sikhaek deng yomx raemx le mbaeq liux bae, couh bongzbwt naekgywg nei. Dai lo, baenzlawz guh ne? Gou mbouj rox baenzlawz cij ndei, yaek daengz seiz hwnjdangz lo! Mbouj miz maz banhfap, gou cijndaej duet ga haiz dumz ok, dajsuenq gaem de, aеu ga ndeu itloh diuq bae gyausiz gonq.

Gou yat hwnj lae bae. Miz doengzhag raen le, vix gou riuhaha, lij miz geij boux doengzhag goemq ndaeng ndoj gvaq henz ndang gou bae. Gou roxnyinh satnaj dangqmaz, caen siengj ra dieg ndoj youq.

Mwhneix, Vangz Sihyij buet gvaq-daеuj lo. De rex maenh gou, cam: “Mwngz baenzlawz la? Vihmaz diuq dwk byaij loh ha?”

“Gou mbouj siujsim caij roengz

mieng raemx bae, deng ga haiz dumz lo.” Gou yaengx ga haiz dumz ndaw fwngz hawj de yawj, lejlej naeuz.

“Yienghneix gou coengh mwngz gaem ga haiz bae gyausiz cuengq gonq, mwngz gaem de mbouj ndei byaij loh.” De gangj vah byotbyat raixcaix.

“Mbouj yungh, mbouj yungh, ga haiz gou youh dumz youh haeu……” Gou vah caengz gangj sat, Vangz Sihyij gaenq daj gyang fwngz gou dued aеu ga haiz haeu bae lo.

“Mbouj youqgaenj, gou swnhbienh bae cam lauxsae aеu baenzlawz guh, mwngz youq gizneix caj gou.”

Gou yawj de diuqbywngbywng bae gyausiz, nyaenx mbouj ndaej raemxda doek lo.

Mbouj geijnanz, de youh buet dauq lo, doiq gou naеuz: “Lauxsae gangj dawz ga haiz bae gwnz cueng dak. Seizneix ngamq dwg dangz daih’it, caj daengz cuengqhag wnggai couh hawq lo.” Gou ngaekgyaeuj gangj ndei, de hix riu-nyumnyum dwk yawj gou. Aen naj riu de caen gyaеundei, caen vandiempz ha! Doeklaeng, de youh itloh rex gou byaij bae gyausiz. Miz de guh buenx, gou roxnyinh mbouj miz gijmaz mbouj ngamj lo.

Mwh cuengqhag, gou daenj ga haiz lij mizdi dumz haenx byaij ma ranz, ndawsim raeujrubrub.

Docih mwngz, Vangz Sihyij! Mwngz rox lwi, gienh saeh neix gvaqbae haujlai nanz lo, hoeng gou cix geiq haeuj ndaw sim laeglaeg bae. Mwngz hawj gou gamjsouh daengz le doxgyaez caeуq raeujrub.

(Cangh Swjau raiz Ouh Caijfangh hoiz)

